

E rite ana tatou ki te tamariki e titiro ana ki tetahi mea whakamiharo kahore nei ratou e mohio; kahore ano hoki te tangata i te mohio ki a ia ake, he kotahi ia otiira he tokotoru—ko te tinana, ko te ngakau, ko te wairua. (2 Teh. v. 23.) Ko te tinana anake ta tatou e kite ai, otiira ehara i te mea kotahi ano te tangata. E takoto ana te tinana ko ia anake i te takiwa kua mate te tangata. Ko te ngakau te mata-puna o nga hiahia, o te riri o te aroha, o te pai o te kino, na to tatou taha wairua i tata ai tatou ki te Atua he wairua nei.

I te iriiringa o te Karaiti ka kitea te Tokotoru. Ko te Tama i te whenua e tu ana, ko te Wairua i te takiwa e heke iho ana ano he kukupa, ko te Matua i te rangi, i rangona tonā reo e mea ana, "Ko taku tama tenei i aroha ai, ko taku i ahuaireka atu ai." E iriiria ana te tangata i runga i te Ingoa—ehara i nga ingoa—o te Matua o te Tama o te Wairua Tapu. Ma te Wairua te tangata e kawē ki a Ihu ki te huarahi (Hoani xiv. 6) ki te Matua. "Nana (na te Karaiti) hoki tatou, te tokorua nei, (te Hura i me te Tau iwi) i whai tatanga atu ai i roto i te Wairua kotahi ki te Matua." (Eph. ii. 18.) E kiia ana i te uinga ki a Pateriki mo te Kotahitanga o te Tokotoru ka mau ia ki te koroa, ka mea, "Kotahi ano tenei, otiira e toru." (Tirohia Tiu. vi. 4; 2 Kor. xiii. 14.)

E whakaakona ana tatou e te Katikihama mo te Tokotoru Tapu me tana mahi mo te oranga o te tangata:—

(1) "Ko te whakapono atu ki te Atua Matua, nana nei ahau me te ao katoa i hanga." Kua tutuki tenei kua oti koe te hanga.

(2) "Ko te whakapono atu ki te Atua Tama, nana nei ahau i hoko me nga tangata katoa." Kua tutuki ano tenei, otiira, e hioa e mohio ana ranei koe kua hokona koe e te Karaiti? Ae? Kaati ra hoatu ta te Karaiti ki a ia.

(3) "Ko te whakapono atu ki te Atua Wairua Tapu, ko ia nei te kai whakatapu i ahau, i te hunga whiriwhiri katoa ano hoki a te Atua." Kei te mahi tonu te Wairua inaianei. Kei roto ranei ia i a koe e mahi ana? Kua tapaea ranei to tinana hei nohoanga mo te Wairua?

I pau katoa te Tokotoru Tapu ki te mahi i te oranga mo te tangata—ka kitea te nui o te tangata ki te ngakau o te Atua. Me whakarite ake pea ki te ahua o nga mea whakateao kia marama ai. Ki te pakeha he tangata ke hei hanga i te whakaahua o te whare, hei

ano tana mahi. Ka oti te whare i te kamura, ka mahi he tangata ke, ma tenei e wanihi e whakapaipai a roto o te whare. Waihoki e te hoa, no te orokohanganga ra ano o te ao i whakaarohia ai e te Atua Matua he take e ora koe. Na tana Tama i whakaoti tenei oranga mou, na te Reme "no te timatanga iho ra ano o te ao nei tona whakamatenga" (Whk. xiii. 8.) I karanga ia i runga i te ripeka, "Kua oti." Otiira ia te Karaiti i te tinana kahore ia i ahei te tomo ki te ngakau o te tangata, na reira ia i mea ai, "Nui atu te pai mo koutou ki te haere ahau, ki te kahore hoki ahau e haere, e kore te Kai whakamarie e tae mai ki a koutou" (Hoa. xvi. 7.) E tomo te Wairua ki te ngakau o te tangata ki te whakapai i roto, kia tapu ai, "a, te wahi i noho ai te Wairua o te Ariki, kei reira te tikanga here-kore" (2 Kor. iii. 17) ara te rangatiratanga, e ngaro ai te ponongatanga—kei reira hoki te aroha, te rangimarie me te hua o te pai.

E te tangata, mehemea kua mohio koe ki tenei hari nui kua whakaritea nei e te Tokotoru Tapu mou, hamama, karanga, "He aha te tangata i maharatia mai ai e koe; te tama ranei a te tangata i tirohia ai ia e koe?" "Kiā whakapaingia a Ihowa mo tona atawhai, me ana mahi whakamiharo ki nga tamariki a te tangata.." (Wai. cvii. 8.)



## NA TE ETITA.

**H**E aha ra te take e kore nei etahi tangata e tuku mai i a ratou whangai mo ta tatou pepa, i te mea kua whakaaturia e te awhi whero ko te wa tera hei whakahounga i te whangai? E puhoi ana matou ki te whakamutu i te puta o te pepa ki te tangata, otiira kua hoki koutou e puhoi ki te tuku mai i ta koutou. He tikanga kuare te whakamawāna ma te tangata e ta he pepa mau, e utu nga pane, nga pepa, e tuhituhi e aha ranei a ko koe me noho noa iho. Ko etahi pea he wareware noa iho, ko etahi pea kei te whakaro, ahakoa e hiahia ana ratou ki te pepa engari kua ratou e utu. E nga hoa, kaore o matou hiahia ki te whakamutu i te tuku atu i te pepa, otiira ki te kore koutou e whakamaharaha mai i a matou ki te rima hereni kei te ora tonu koutou, tera matou e mea kua riro koutou he ao ke, a e whakamutua te puta atu o te pepa ki a koutou. Kei mihiro koutou ina kore he pepa ma koutou a tera marama. Ki te kore koutou e korero nupepa ka kuare koutou ka hopu he noa ranei i te korero. Ko te whakaaturanga whakamutunga tenei.